



БЛАГОВЪСТНИК

РОЧНИК VII. * ЧИСЛО 5. * МАЙ 1927.

ОТВЪЧАТЕЛЬНЫЙ РЕДАКТОР: О. ЕМИЛІЯН БОКШАЙ

СОДЕРЖАНІЕ:

Христоствъ воскресъ — встаньме изъ сна. — Воскресеніе. — Де знайти правду? Чия вѣра есть православна? Ци россійска Церковь е каѳолическа и едина? Унія на Руси. — Иэъ схиэматацкого - большевицкого

раю на Подк. Руси. — Ереси або ложнѣ ученія о вѣрѣ. — Мъсячное намѣреніе на Май. — Новости. — Переписка редакції. — Одъ администрації.

ВЫДАЕ ВЫДАВНИЦТВО ЧИНА СВ. ВАСИЛІЯ ВЕЛ. В УЖГОРОДЪ
из книгопечатни оо. Василіян в ужгородъ, ул. Раковція число 54.

Выдавництво Чина св. Василія Великого въ Ужгородѣ

поручає слѣдуючѣ книжки своєго изданія:

Повный Требникъ (печатаный въ Жовквѣ). Обнимаетъ 899 стор.

Находятся въ немъ всѣ чотыри части: I. Таинства, II. Освященія, III. Благословенія, IV. Моленія на всяку потребу. Двойный друкъ: чорный и червоний. Форматъ дуже додгодный. Ясный переглядъ, буквы читкѣ, выразнѣ.

Оправленый въ кожу стоитъ 150 Кч, а съ почтою порученою 155.— Кч.

Молитвенникъ для греко-каеолицкого руського народа.

Составиль о. Петро Котовичъ ЧСВВ. стор. 507. Изд. II.

Содержаніе сеѧ книжки: Короткій катехизмъ; Молитви повседневніи; Молитви утреніи, Молитви вечерніи, Молитви подчасъ Службы Божої, Приготовленіе до св. Сповѣди, Молитви передъ и по сповѣди, Молитви передъ и по св. Причастію, Молитви до пресв. Сердца Іисусового, Молитви до Пречистої Дѣви Марії, Молитви до святыхъ. Чинъ Утрени, Божественная Литургія, Чинъ Вечерни. Акафистъ до І. Христа, Акафистъ до Преч. Дѣви Марії, Тропарѣ воскресніи и повседневніи, Служба на всякое прошеніе, о усопшихъ, Тропари и Кондаки св. Четыредесятницы, Пятьдесятницы и всѣхъ праздниковъ декретальныхъ. Кромѣ сего є: Пѣснь на Рождество Христове, Пѣснь въ честь св. Тройцѣ, Пѣснь въ честь Преч. Дѣви и св. отца Николая, Пѣснь благодарственная, Календарь цѣлого року и Пасхалія.

Оправленый въ полотно стоитъ 7 Кч. Съ почтою засылкою 7·80 Кч.

Отпустовъ молитвы. Сеѧ книжочка содержитъ: Короткое поученіе о отпustaхъ и дасколько молитовъ надѣленыхъ отпустами.

Стор. 16. — Цѣна 50 гел., а съ почтою засылкою 70 гел.

Образцъ (печатанъ одною краскою): 1. Пресв. Сердце Іисуса; 2. Св. Іоаннъ на грудяхъ І. Христа; 3. Св. Ангель Хоронитель. На всѣхъ образцяхъ на оборотѣ помѣщенъ одповѣднѣ молитвы.

1 примѣрникъ (дарабъ) стоитъ 20 гел. 100 примѣрн. 18 Кч,
съ почтою засылкою 18 Кч 40 гел.

Образець Матери Божої Мукачевскої съ пѣснею на оборотѣ.

Цѣна одного примѣрника 40 гел.

Роздумай то добре. На руській языкъ переклавъ о. В. Желтвай. Первое изданіе. Содержить науки о цѣли человѣка, о грѣсѣ, о смерти, о судѣ, о пеклѣ, о чистилищи, о небѣ и о сповѣди.

Брошуревана книжочка, сторонъ 160.

Одинъ примѣрникъ стоитъ 5 Кч, а съ почтою засылкою 5 Кч 60 гел.

Маєме такожъ на складѣ Книги до записуванія інтендій Службъ Божихъ.
(200 стор. оправленыхъ) по 28 Кч. за примѣрникъ вже з почтою.

Засылається лемъ за готовъ грошъ або за послѣплатою (dobirka)

Листы и грошъ треба засылати на адресу:

Выдавництво Чина св. Василія Великого, Ужгородъ,
— — — — — Раковци улица число 54. — — — — —

Листы изъ заграницы треба адресовати такъ:

Vydavnyctvo Čyna sv. Vasilija Velikoho, Užhorod,
Rakociho ulica č. 54. Podkarp. Rus. ČSR. — Европа.

БЛАГОВѢСІ ПІДКАРПАТСЬКІ

ДУХОВНА ГАЗЕТА ДЛЯ ПОДКАРПАТСКИХЪ РУСИНОВЪ

Выходить 1-го кожного мѣсяца.

Адреса

Редакціѣ, адміністраціѣ и експедиціѣ :
Выдавництво Чина св. Василія Великого
въ Ужгородѣ, улиця Раковци число 54.

Предплата:

Въ Республіцѣ на цѣлый рокъ 10 Кч.,
за границю 17 Кч. До Америки 0·50 (половь) дол.
Одно число „Благовѣстника“ стоитъ 1 Кч.

РОЧНИКЪ VII.

ЧИСЛО 5.

МАЙ 1927.

Христосъ воскресъ — встаньме изъ сна!

Коли Христосъ въ Геєсеманской загородѣ такъ горячо молився и такъ дуже потребовавъ помочи и утѣшенія — апостолы лишили Его въ самотѣ и спали. А Христосъ ту горьку и болесну ночь мусѣвъ перебыти самъ...

Апостолы спали, але вороги Христа були дуже дѣяльнѣ. Въ ночи потокмилися зъ Юдою, въ ночи зловили Его въ загородѣ, въ ночи привели Его до Анны и Каяфи и вырѣшили Его смерть, въ часъ рано пошли до Пилата, чтобы потвердивъ смертный засудъ надъ Христомъ. А сеѧ страшноѣ ночи апостолы спали и лише двое изъ нихъ Петро и Іоанъ смѣли за нимъ ити зъ далеку...

И днесъ, коли Церковь Христова только много терпить, сколько много такихъ сплячихъ апостоловъ и вѣрниківъ маєме. Не хотять видѣти и чути, что синагога, фарисейство и жидовска рада нынѣшнього часу т. е. схизма, ересь, комунізмъ и безвѣріе зговорилися убити Церковь Христову, якъ колись жиды убили Христа, чтобы знищiti Христову вѣру и заскѣпiti въ сердцяхъ людей ересь, схизму и безбожіе. Коли читаеме ихъ новинки („Русская Земля“, „Карпатска Правда“) лише самъ клеветы, лайки, брутальнѣ напады найдеме въ нихъ противъ нашоѣ вѣры, Церкви и духовенства! Имъ все доброе и похвальное, лише наша вѣра, наша Церковь нѣть. Они подобно тымъ жидамъ дуже чиннѣ и агильнѣ суть. Держать зборы, организуються въ политичныхъ партіяхъ, выдаютъ книжки противъ вѣры, закладаютъ читальнѣ, закликуютъ або (лише просто) посвячуютъ батюховъ, ширять схизму, баптизмъ, суботництво и головно урываютъ авторитетъ и честь нашихъ священниковъ, чтобы народъ лишився свого духовенства и ставъ добычею безвѣрія...

И коли нашъ ворогъ такъ працює, нашъ апостолы сплять и спочивають. Маєме хвалу Богу христіянску партію, маєме христіянскѣ газеты, маєме вождовъ и оборонцовъ нашої вѣры, маєме

письменниковъ, але ихъ праця е утруднена. Бо многъ изъ тыхъ, навѣть изъ апостоловъ, (котръ мали бы выйти на фронтъ) стануть на бокъ и не мѣшаються въ борьбу, або критизують тыхъ, котръ на житіе и смерть воюють, або здали всю надѣю, або изъ политич-ныхъ причинъ отдаляються одъ борьбы въ оборонѣ вѣры. И самъ народъ не весь е доста свѣдомый. Байдужность, неохота, ровно-душность пануе въ ихъ сердцахъ и не годнъ розпалитися ревностю и святымъ огнемъ въ оборонѣ Церкви и вѣры. Дѣйстнѣ сплячъ „апо-столы“ тогды, коли ихъ Христосъ бореся зъ непріятелемъ...

Але прійшовъ часъ, коли апостолы пробудилися изъ сна и почали працьовати! И якъ ишла та робота! Всѣ якъ мужъ ишли въ бой, якъ ангели зъ мечемъ огненымъ, якъ герої зъ саможертво-ваньемъ! У короткій часъ про славу и величіе Христа говорила Мала Азія, Греція, Италія, Африка, Панонія и цѣла римска держава. И почалася прекрасна и свѣтославна доба мучениковъ, коли мілліоны и мілліоны умерли за того Христа, котрого такъ боязливо залишили апостолы въ Геєсеманской загородѣ...

Такъ бы и намъ робити въсѣмъ. Противъ схизмы, комунизма, ереси окремъ Божої помочи нема іншого оружія, якъ праця и праця. Най кождый священникъ встане изъ сна и най береся ревно до дѣла въ своеемъ селѣ. Най постарається, чтобы вѣрники читали и предпла-човали на христіянску новинку „Благовѣстникъ“, най постарається, чтобы вѣрники залишили ту читальну, котра е въ службѣ схизмаки-ковъ, най вплыває на вѣрниковъ, чтобы не були членами комуни-стичної, або якоїсь схизматицкої партії, але христіянскої, най за-ложить межи ними якоесь христ. рел. товариство и най просвѣщує и освѣдомляє людей проповѣдями и наукою. Не сплячихъ, але дѣ-яльныхъ апостоловъ пожадає въ нынѣшномъ часѣ Христосъ и Его св. Церковь.

Але священникъ самъ не е силѣ все зробити. Най не будуть и вѣрники нашѣ такъ байдужнѣ! Най не сплять! Най не повѣрять такъ легко тымъ схизматицкимъ и комунистичнимъ пройдисвѣтамъ, але най мають смѣлости указати имъ куды е дорога изъ села. И коли нападають на Церковь и на священниковъ на зборахъ, та най має нашъ селянинъ смѣлости и одвали стати въ оборонѣ ихъ и не дозволити, чтобы ногами топтали волоцюги нашѣ дорогоцѣннѣ скарби: вѣру, Церковь, духовенство и пр. Най той вѣрникъ не допушчає въ свою хижу новинку, яка пише противъ вѣры, противъ Церкви, але най смѣє на огень веречи. Най той вѣрникъ знає, что онъ не лишь въ церкви е христіяниномъ, але и тогды, коли голосовати треба на посла до парламенту, або на сельскихъ выборахъ.

Если мы будеме такъ бодрѣ, чуйнѣ, и станеме изъ сна, тогды щезнуть нашѣ вороги, якъ коли щезли и утѣкали вороги Христа, якъ Онъ воскресъ изъ мертвыхъ. Прилѣжною працею и свѣдомостю достигнеме зновъ то, что на Подкарпатю буде лишь оденъ пастырь и одно стадо и свѣдомый христіянскій народъ.

Читайте и ширѣть „Благовѣстникъ“. — Еднайте предплатниковъ!

Воскресеніе.

НАРОДЪ настращено и каючися бився въ груди и стремголовъ утѣкавъ зъ горы до Іерусалима. Римскѣ вояки порозкидали оружія и бѣгли за народомъ.

Помало затихло все.. На Голгоѳѣ темно стояли три кресты. Передъ середнимъ крестомъ стояла Марія, мати болѣзни, голову свою склонивши. Марія Магдалена клячала и руками обняла крестъ Іисуса. Довгое, золотое волося схопивъ вѣтеръ и закрывъ нимъ перебитѣ ноги на крестъ розпятого.

Низше стоявъ гуртокъ людей: Марія (мати ап. Якова), Саломе (мати сыновъ Зеведеовъ), изъ мертвыхъ воскресшій Лазарь зъ Марою и наймилѣйшій апостолъ Іоаннъ.

Жоны тихо склонили головы, але Іоаннъ зъ напруженуо увагою дивився въ напрямъ Іерусалима. На конци пришли тѣ, которыхъ чекавъ: два мужи. Изъ одежи ихъ можно спознати, что суть членами рады жидовскої. Высшій, то Іосифъ изъ Аримаея, членъ меншої рады въ Іерусалимѣ — бѣлое полотно державъ въ рукахъ. Старшій, то Никодимъ, членъ найвысшої рады, кто въ оборонѣ Христа выступивъ противъ архіерея и первосвященниковъ. За нимъ ишовъ слуга несучи на плечахъ велику судину зъ олеемъ.

Іоаннъ скаже жонамъ: иде уже Никодимъ и Іосифъ.

Саломе подняла голову.

Іосифъ несе полотно, Никодимъ же олеѣ.

Мароа вздыхнула: Слава Богу! Пилатъ послухавъ Іосифа и дозволивъ зняти Господа зъ креста и поховати.

Два мужѣ и зъ ними и тѣ другѣ пошли на гору. Іосифъ приступивъ до креста и вытягнувъ гвозди. Знявъ бѣлое тѣло и завивъ въ чистое полотно и богато покропили дорогими олѣйками. На конци Іосифъ взявъ тѣло въ руки, Іоанъ приступивъ ему въ задъ и дорогу голову Христа положивъ собѣ на плечи. Никодимъ лагодно обнявъ ноги и смутный походъ рушився зъ горы.

Межи зелеными деревами и цвѣтучими корчами бывъ выкопаний той гробъ, что Никодимъ давъ собѣ зробити. Величезнѣ скалы и вытесанѣ камъня окружили темный гробъ. Мужѣ осторожно пустили тѣло въ гробъ и на отворъ гроба положили великій камень. Потомъ вернулися въ Іерусалимъ; мужѣ зъ зажуренымъ лицемъ, а жоны зъ слезами въ очахъ.

Передъ воротами города жоны зъ Іоанномъ пошли на передъ, Никодимъ и Іосифъ зостали изъ заду. Разъ лишь приходили на пути римскѣ легіонеры и звѣдаются:

— Благородный совѣтнику, звѣдаюся, ци поховалисте уже Іисуса Назарейскаго, царя жидовскаго?

Іосифъ указавъ на загороду:

— Въ той новый гробъ положилисме, въ котромъ еще никто не лежавъ. Але чому ся звѣдуете?

Проводникъ легіонеровъ потолковавъ:

— Понтійскій Пилатъ дозволивъ первосвященникамъ, чтобы могли дозирати за три дни гробъ; бояться, что ученики его прийдутъ и украдутъ тѣло и народови будуть казати, что воскресъ изъ мертвыхъ. Казали и пошли.

А богообойнѣ жоны подъ тымъ часомъ дойшли до дому. Мати знесиена одъ довгихъ и великихъ муکъ безъ памяти склонилася на постель; Марія Магдалена на колѣнахъ стоячи плакала, розорвала одежду и попель сыпала на голову. Слезы струями текли. И такъ найшла ихъ зоря, и такъ прийшовъ и темный вечеръ великоѣ Суботы.

Третього дня рано Магдалина еще передъ всходомъ сонця убралася, почесалася и тихенько збудила Салому и Марію, матерь Якова.

— Берѣть скоро благованнѣ олеѣ и спѣшъмъ до гроба Господа помазати Его тѣло. И пошли.

Іерусалимъ спавъ спокойнымъ сномъ. Жоны приходили до горы Морія и стали передъ храмомъ Іерусалимскимъ. Межи великими колумнами отворено стояли дверѣ и видно было, что въ церкви левиты и священники якъ неспокойнѣ тѣни колибаються. Дальше видно было, что свѣчки горятъ и єиміямъ курить.

На дворѣ якъ старѣ жидовскѣ бабы сидѣли въ товариствѣ жебраковъ, слѣпыхъ, хворыхъ и пр., котрѣ голосно молилися. Разъ лишь подоймeseя одень старый еврей и поднесе руки до неба зъжалемъ:

— Ударивъ еси зъ мечемъ твоимъ на нась, о Іегово! Ось розорвалася заслона церкви и теперь отворено стоить святыня. О Боже благій, не карай насть такъ дуже!

Надъ горою Оливною поднялася зоря и засвѣтила цѣлу окрестность. Три старѣ жебраки схопилися и нагло подивилися на западъ въ сторону Голгоѳы.

— Дивѣтесь, якій свѣтлый стовпъ спускается зъ горѣ на Голгоѳу, бѣльшій одъ снѣга и блескучій якъ громъ. Засвѣчуе и нашу вѣчну темноту.

Другѣ жебраки такожъ зхопилися и подняли руки:

— Что гучить такъ чудесно, что и мы глухѣ почули'сме. Не чуете, якъ звенить чтось изъ стороны Голгоѳы?

На дороze уже почалося житѣ. Марія вхопила руку жонъ и казала:

— Спѣшъмъ, бо городъ уже пробуджається. Передъ горою Кальваріѣ стоявъ пастухъ. Приперся на бигаръ и очи не знявъ зъ горы Голгоѳы. Около него ягнята пасли и бараны скакали. Пастырь обернувшись до жонъ и каже:

— Видите тамъ той крестъ на серединѣ? Якъ разъ теперь, передъ пару минутами спустивъ на него свѣтлый облачный стовпъ и изъ хмары выступивъ одень юноша. И зыйшовъ зъ горы и я видѣвъ, что трава не похилилася подъ его стопами и слѣдъ не лишився за нимъ на дороze. И зайшовъ въ ту загороду, где той новый гробъ стоить, и котрый вояки сторожать. Поднявъ руку, а вояки покрывали лиця свої, упали на землю и такъ лежали, якъ мертвѣ. Потомъ молодецъ зникъ, а вояки порозкидали оружія и утѣкли въ Іерусалимъ. Жоны дивовалися чуючи сю бесѣду.

— Не знаю — каже Магдалена --- про якихъ вояковъ говорить; але сиѣшъмъ, чтобы не зловили нась коло гроба.

— И кто одвалить намъ камень одъ гроба? Звѣдася Саломе.

Никто не одповѣдав на еѣ вопросъ, лишь вѣтеръ зашумѣвъ межи деревами.

Подъ тымъ прибыли до гроба. Але нагло застановилися бо гробъ бывъ отвореный и камень лежавъ на землѣ.

— Иду и скажу апостоламъ, что камънъ одваленый. Каже Магдалена. И почала бѣгти въ сторону города. А другъ двѣ жоны зайшли въ гробъ и майже не оставпѣли одъ страху. Въ гробѣ на камени сидѣвъ ангель; лице сяло якъ сонце, одежа бѣла якъ снѣгъ. И каже имъ:

— Не бойтесь! Вы розпятого Іисуса глядете? Не е туй. Се мѣсто, где положили его. Але идѣть и скажѣть апостоламъ и Петрови, что спередъ вами пойде въ Галилею и тамъ увидите его, якъ предсказавъ вамъ.

Саломе и Марія закрыли свое лице и утѣкали изъ гроба, не смѣючи поглянути въ задъ.

Подъ тымъ часомъ Марія Магдалена поглядала апостоловъ. Петро сидѣвъ коло стола и склонивъ свою голову; Іоаннъ смутно и зъ слезами въ очахъ дивився въ гору. Марія вхопила ихъ руки.

— Пойте и дивѣтесь, ктось одваливъ камънъ одъ гроба.

Апостолы подскакали и выбѣгли. И бѣгли всѣ троє. Іоаннъ молодшій бывъ и найскорше прибѣгъ до гроба. Але почекавъ Петра.

Петро зайшовъ въ гробъ и видѣвъ, что гробъ порожній; лишь полотно, въ котромъ завитое было тѣло Іисуса лежало на землѣ. Вступивъ и Іоаннъ и видячи се притиснувъ лице свое до скалы и сказавъ:

— Воскресъ, якъ сказавъ!

И вернулися оба въ Іерусалимъ.

И тоды добѣгла и Марія Магдалена. Зайшла въ гробъ, стала на колѣнки и почала плакати. Коли подняла голову увидѣла двохъ ангеловъ, котрѣ такъ одзывалися до неѣ:

— Жоно, чому плачешъ?

Марія Магдалина подивилася на него и сказала:

— Бо понесли моего Господа и не знаю куда дѣли.

Наразъ зазвенѣвъ лагодный, милый голосъ, якъ весняный по-дувъ вѣтра:

— Жоно, чо плачешъ? Кого глядаешъ?

Марія Магдалена обернулася и просячи подняла очи свої на чоловѣка, одѣтого въ бѣлу одежду.

— Пане, если ты мавъ его понести, скажи менѣ куда положивъ есъ и я понесу.

Тоды той подивився на Марію и тихенько промовивъ:

— Marie!

Марія на се верглася до ногъ Іисуса и розпростерла свої руки зъ словами:

— Учителю!

Але Христосъ заборонивъ.

— Не дотулися до мене, бо я еще не пошовъ до моего Отца; але пойди до моихъ братовъ и скажи имъ: Вознесуся до моего Отца и до вашего Отца, до моего Бога и до вашего.

Марія приклонила голову и поцѣловала землю где Христосъ стоявъ. Потомъ рушилася въ сторону Іерусалима. На пути изъ величезної радости повторяла:

— Чуете вы, цвѣтоноснѣ луги, поля, горы, долины, небо, земля и всходячое сонце, Онъ воскресъ!

Потомъ поглянула на Іерусалимъ.

— И ты доњко Сиона, свѣтлый Іерусалиме, зъ твоими вѣрующими и невѣрными сынами, зъ гордыми и смиренными, зъ богатыми и жебраками, почуй мой могучій голосъ: Онъ воскресъ!

Розпростерла своє руки противъ неба.

— И вы всѣ на цѣломъ свѣтѣ, котрѣ плачете и сумуeteся, не плачте и не журѣться, але створѣть вашѣ сердца передъ правдивымъ Спасителемъ, котрый днесь воскресъ изъ мертвыхъ!

Передъ воротами городскими тамъ дрѣмавъ воякъ-сторожъ. Якъ учувъ голоснѣ слова Марії, позвѣдався:

— Кто воскресъ, жено?

Марія Магдалена положила руки на сердце и тихенько сказала:

— Іисусъ Назаретскій, Сынъ Божій.

Августина Рубенеску.

Де знайти правду?

Написавъ свящ.: ТЕОДОЗІЙ ЛЕЖОГУБСКИЙ.

(Продовження).

Чія вѣра е православна?

— Тадъ св. Феодозій бывъ православнымъ — перервавъ хворый.

— Такъ, дѣйстно — промовивъ о. Петро. — Св. Феодозій Печерскій бывъ дѣйстно православнымъ, бо цѣла каѳолическа Церковь е православна, то есть така, что славить право, вѣрить право (добре). Тадъ въ нашомъ Богослуженю всюда уживається слово „православный“.

— А кто мы есме? — зазвѣдавъ хворый?

— Вы ис есте православнѣ, бо вы не вѣрите право, такъ якъ мы, вы только называете себе православными, бо думаете, что маєте праву вѣру.

— А якъ вы называете нась? — звѣдавъ дальше хворый.

— Мы — одповѣвъ о. Петро — повиннѣ васъ называть схизматиками, бо вы одорвались одъ правдывої Церкви, бо греческе слово „схизма“ значитъ только что „одорваня“, роздоръ.

— Мы гр.-каѳолики повиннѣ васъ завсе называть схизматиками, але чтобы вам не зробити прокости, не вразити васъ, тому то мы вашу Церковь называеме або греко-російскою, або коротко росій-

скою, а греческу не з'единену зъ апостольскимъ престоломъ коротко греческою, чтобы еѢ одрѣжнити одъ нашоѢ, яка е греческою и каѳолическою. А схизматиками называеме тыхъ одступниковъ, котрѣ родилися и крестилися въ вѣрѣ греко-каѳ-ой, але потомъ на намовленя агитаторовъ, одступили одъ неѢ.

Ци россійска Церковь е каѳолическа и едина?

— Наша Церковь е такожъ каѳолическа — промовивъ нагло хворый.

— Нѣ, брате — сказавъ о. Петро. — Греческое слово „каѳолическа“ значить только что соборна, т. е. всесвѣтна, загальна, все-ленска, а ваша Церковь не е соборною и всесвѣтною. Бо тѣ Церкви, что зачислють себе до греческоѢ, т. е. восточноѢ Церкви, якъ греческа, россійска, болгарска, румуньска и иншѣ, суть призначенѣ не для всѣхъ народовъ, але для якогось народа, значитъ: и пр. россійска для тыхъ, что належать до державы россійскоѢ, греческа для Грековъ, болгарска для Болгаръ. Межи тымъ каѳолическа Церковь не е Церквою народною, але всенародною; она е для Французовъ, Нѣмцовъ, Чеховъ, Русиновъ, Поляковъ, Россіянъ и для всѣхъ іншихъ народовъ.

— Тѣ Церкви, что зачислють себе до восточноѢ, не суть зъ собою сполученѣ въ одну, всесвѣтну Церковь. Кожда изъ нихъ має свого окремого верховного начальника, независимого одъ другихъ. На чолѣ россійскоѢ Церкви стоявъ царь, на чолѣ турецкоѢ царгородской патріярхъ, на чолѣ греческоѢ синодъ въ Аѳенахъ, на чолѣ болгарскоѢ митрополитъ и такъ у всѣхъ.

— Одъ часу, коли наставъ роздоръ за Керуларія, восточна Церковь не скликала анѣ одного спольного собора и не скличе его нѣколи, доки якъ каѳолическа Церковь скликала одъ часу Керуларія ажъ 12 вселенскихъ соборовъ.

— А чому восточна Церковь не скличе собора? — спитавъ цѣкаво хворый.

— Бо не може скликати — одповѣвъ о. Петро. — А не може тому, что межи тими Церквами, что зачисляють себе до восточной Церкви, нема згоды въ nauцѣ.

— Царгородской патріярхъ одлучивъ одъ восточноѢ Церкви (въ р. 1872.) болгарску Церковь. Одъ того часу греки считають болгаровъ еретиками, а россіянне правовѣрными.

— Неразъ бывае таке, что то, что учить одна изъ нихъ, перечить друга. Ось вамъ примѣръ:

— Коли кто изъ лутеранскоѢ вѣры хоче перейти до Церкви россійскоѢ, то не потребуе на ново креститися, але греческа Церковъ жадае, чтобы такій давъ окреститися по другій разъ. Въ россійской Церкви крещеніе лутеранскоѢ Церкви е важне, а въ греческой нѣтъ. Така то плутаница пануе межи сими Церквами, что зачисляються до греческоѢ Церкви.

Ось до чого дойшла славна колись греческа Церковь! Роэпа

лася на дасколько десятковъ Церквей, якъ зъ собою не стоять въ нѣякоѣ едности. Одна на другу дивится зъ горы, одна другу посудже о ереси та блуды. Не могутъ зойтися на спольну нараду, якъ то робить каѳолическа Церковь, скликующи епископовъ изъ цѣлого свѣта, бо не мають спольноѣ подвалины-камѣня, на якомъ Христосъ збудовавъ свою правдиву Церковь, не узнаютъ Христового Намѣникоа своимъ выдимымъ Головою.

— А что мае робити восточна Церковь? — зазвѣдавъ хворый по хвилѣ мовчанки.

— Вернути назадъ до скалы св. Петра — одповѣвъ о. Петро — признати римскаго папу своимъ выдимымъ Головою, признати науку, якоѣ учить каѳолическа Церковь и стати знова славною сестрою каѳолическоѣ Церкви; зробити такъ, якъ зробила руська Церковь, котра противъ власноѣ волѣ одорвана одъ каѳолическоѣ Церкви, въ конци злучилася зъ нею.

— Коли се сталося? — звѣдавъ хворый.

— Ось послухайте.

Унія на Руси.

— Два разы пробовала хопитися Русь скалы св. Петра.

— Разъ за короля Данила, за якого починомъ вернула руська Церковь до каѳолическоѣ Церкви. Та повѣявъ сухий вѣтеръ изъ востока, одъ Монголовъ, котрѣ загрозили, что зруйнують Русь, коли та не одлучится одъ Риму и одорвавъ ростинку одъ скалы св. Петра.

— Другій разъ за кіевскаго митрополита Изидора, коли то руська Церковь разомъ зъ греческою, на фльорентійскомъ соборѣ (1439) признала папу Головою Церкви и приняла св. Соединеніе. Та и симъ разомъ повѣявъ поганый вѣтеръ зъ сѣвера, зъ Москвы, (яка не хотѣла злуки зъ Римомъ и увязнила Изидора) и одорвавъ Русь одъ скалы св. Петра, доки еще успѣла добре запустити корѣня.

— Ажъ за третимъ разомъ мало что больше, якъ триста лѣтъ тому, вдалося руськимъ епископамъ вернути до каѳолическоѣ Церкви. Золотыми буквами записавъ руській народъ имена тыхъ, котрѣ цѣлею свого житя поставили соединеніе руськоѣ Церкви зъ каѳолическою. Сталося се на соборѣ въ Берестю въ р. 1596., а имена тыхъ, что довершили сего преважного дѣла е: епископъ володимирскій Іпатій Потій, епископъ луцкій Кириль Терлецкій, митрополитъ кіевскій Михаиль Рагоза, а потомъ его другій наслѣдникъ Іосифъ Веляминъ Рутскій. Се справедливъ добродѣль руського народа. Бороли ся зъ чужими, боролися и зъ заслѣпленіемъ самыхъ Русиновъ.

(Продовжсня слѣдуе.)

Изъ схизматицко-большевицкого раю на Подк. Руси.

Самъ признаются.

„Русская Земля“ была и е найгоршимъ защитникомъ схизматиковъ и хитрымъ способомъ знае навѣть наибольшѣ провини схизматиковъ обернути на ихъ похвалу. Але и еъ терпеливости есть конець. Въ 14-омъ числѣ изъ 7-го апрѣля уже не може замовчати той шкандалъ, что робивъ оденъ батюшка въ Тячовѣ, въ гостинницѣ „Корона“ и то въ великомъ постѣ. (Вѣсть перебереме словно изъ „Русской Землѣ“).

„Дня 14. III. въ Тячовѣ бывъ ярмарокъ и собралося много людей и жидовъ, были и купцѣ изъ Чехіи и Моравії. На сей ярмарокъ приѣхавъ и схизматицкій (Р. З. пише, что православный?!?) батюшка (Р. З. пише, что священникъ??) изъ села Тереблѣ. Вечеромъ батюхъ зайдовъ въ гостинницю „Корона“ и зачавъ танцовати; розмахався (неборакъ батюхъ) своими довгими ногами, держачи въ рукахъ револвер-бровнинг. Схизматицкій батюхъ и то въ великомъ постѣ танцуе публично! (Соблазняеся богобойна „Русская Земля“). Сie огорчуоче поведеніе батюха и головно револвер розбурили людей и вергли ся на батюха и почали копкати въ него и набили его, чтобы не забывъ якъ въ постѣ справоватися. Многъ се видѣли и жиды и чужѣ“.

Сякъ подае сю вѣсть „Р. З.“, а въ дальшихъ проектуе, чтобы Ириней одстранивъ всѣхъ батюховъ тутешныхъ (неграмотныхъ) и припровадивъ изъ Сербії ученыхъ. (Се мы уже изъ иншихъ жерель чули).

Что на се кажуть нашѣ лжебрата схизматики? Что не правда? Най прочитають „Русску Землю“ зъ 7-го апрѣля 1927, тамъ найдуть и больше. Отже видите не все золото, что блистить. Суть люде, котрѣ могутъ на себе натягнути и реверенду и пустити бороду и довгое волося и называть себе „православными“, але сю святость лишь доти держать, доки въ селѣ суть. Коли „милѣ православнѣ братя и сесгры“ не видять, гайда танцовати, пити, гуляти навѣть въ великомъ постѣ. Шкода, шкода, что нашѣ вѣрники такимъ одиницямъ повѣрять и лишать свою отцевску вѣру.

Лишь не простою дорогою.

Довѣдуемся изъ достовѣрного жерела, что схизматицкій епископъ Ириней, котрый лишивъ свою епархію въ Югославіѣ и прійшовъ укрѣпляти нѣбыто „православіе“, по правдѣ безвѣріе и комунізмъ на Подкарпаттю, загнавъ недавно якогось новоупеченого діакона до Сербії, чтобы онъ збиравъ складки на будову схизматицкихъ

церквей на Подкарп. Руси. Сесь „православный“ діяконъ заходить до нашихъ греко-каѳол. громадъ въ Бачуѣ и Славоніѣ и выманиюе одъ нашихъ братовъ греко-каѳоликовъ грошъ кажучи, что збирає на будову „руськихъ“ або и „греко-каѳол.“ церквей на Подкарпаттю. Знає сей хитрунъ добръ, что свѣдомъ греко-каѳолики въ Югославіѣ бигарами гналибы одъ себе сякихъ мантійовъ, еслибы они отверто сказали, что на яку то цѣль збирають грошъ иproto и не хоче признатися, что „православный“ еп. Иреней загнавъ его збирати жертвы на схизматицѣ церкви. Позвѣдуемся еп. Иренея, ци сякое поступованіе лукавое, фарисейское, брехливое его висланника годится зъ Христовимъ Евангеліемъ? Если айно, такъ не много стоитъ цѣлое его сербское „православіе“ и не варто его заскипляти межи нашимъ народомъ, — если же нѣть, то чому такъ лукавъ, хитръ, подступнѣ инструкціѣ давъ своему „православному“ діяконови, бо чайже самъ отъ себе онъ сего не робить. Христосъ Господь нѣколи не поручавъ своимъ апостоламъ брехнею ширити свое царство. Не чинѣть же сего и вы, бо се мерзкое дѣло передъ Богомъ.

Не прикрывайтесь овечною кожею, але покажѣть явно свої вовчѣ зубы и вовчій хвостъ. Уже и нашъ збаламученъ братя зачинають на васъ познаватися и не вѣрять вамъ.

Радуйтесь схизматики.

„Русская Земля“ эновъ має причину плакати. Теперь проливає свої слезы про то, что одень схизматицкій батюшка Влад. Виценикъ изъ Мал. Давидкова оставивъ компанію еретиковъ и Чирича и Савватія и перешовъ до насъ.

Что на се має сказати Р. З.? Хвалити и не може, та ганить. Написала статію: „Радуйтесь...“ въ котрой каже, что п. инж. Вл. Ваценика въ Бельгіѣ осудили на 6 мѣсячный арестъ и на якусь грошеву кару.

Правда ци не правда — не знаєме. (Може что и не правда, бо каџапы люблять обманьовати людей). Але если паны изъ Р. Земль, котрѣ всѣ твердѣ „православнѣ“ знали про п. инженера Виценика, что чогось має за плечами, та тогды чому приняли его и чому дали его посвятити на батюшку. Та у васъ твердѣ „православнѣ“ и такій може быти батюшкою, кто бывъ караный арестомъ?! Се е дивна рѣчъ. (Якъ довѣдуемся, п. Вицинекъ подавъ до суду тыхъ, котрѣ его обклеветали).

А коли вы его посвятили, та теперь цитте! Бо если добрий бывъ у васъ за священника, то ачей добрий буде и у насъ за простого вѣрника. Панъ Виценикъ добре робивъ, что оставилъ васъ и оставилъ схизму; моглибысте и вы уже разъ оставили блудъ и ересь и покаятися.

Якъ повстало схизма въ Росушцѣ? (Ж. Марам.).

Наше село належить до Кобыл. Поляны. Священникъ кождоѣ третьоѣ недѣлѣ приходивъ до насъ; тогды мы еще держалися до

одного престола Петрового. Але въ войнѣ нашѣ людс познакомилися въ Россіи зъ бородатыми батюхами и закортѣло и у себе такого мати.

Якъ хотѣли, такъ и робили. Пошли до Вел. Бычкова до якогось „протоіеря“ Козака, россіяна и просили его, чтобы прийшовъ до нихъ. Але Козакъ мудрый бывъ и не хотѣвъ безъ токмы ити. Пожадавъ, чтобы люде списалися и завязали комитетъ. Коли уже гдеякъ подписалися, появився батюшка въ селѣ. Зъ бычковскими людьми зайшовъ до церкви и хотѣвъ одправити Вечерню. Нашѣ вѣрники якъ разъ въ церкви были и коли батюхъ приступивъ до престола, прискочивъ до него нашъ вѣрный кураторъ Скрипка Василь и переставъ ему дорогу. Батюшка напудився, и черезъ вечерню бывъ въ церкви лишь коло лѣвого крылоса. Коли по вечернѣ нашѣ люде выйшли, батюхъ зачавъ свою „проповѣдь“. Нападавъ всякими грубыми словами на кураторовъ называющими ихъ „копыто — або пятьлизунами“ и пр.

Потому Козакъ уже самъ не ходивъ, але заславъ мѣсто себе другого батюшку им. Носа Юрка. Онъ живъ въ хижѣ одного чоловѣка и люде носили ему ъсти. Але сесь уже лишь коло церкви „одправлявъ“, бо нашъ добрый церковникъ замкнувъ церковь и не пустивъ его. Крутилися нашѣ схизматики, что робити; але ни одъ церковника, ни одъ куратора не могли достати ключа. На конци два схизматики залѣзли въ церковь черезъ окно и зъ здну отворили дверѣ и батюшка зъ великимъ торжествомъ зайшовъ.

Зайшовъ, але незадовго и выйшовъ. На праздникъ Благовѣщення года 1925. появився въ селѣ журать изъ Рахова зъ жандармерію и выгнавъ и батюха и схизматиковъ изъ церкви.

... У пару дней у поломени горѣла наша стара деревляна церковця...

Православный а не схизматикъ.

Ереси або ложнѣ ученія о вѣрѣ.

КОЛИ св. Павель въ Милетѣ попрашився зъ своими вѣрниками сказать имъ: „Ізъ ко вѣмъ (энаю) сїє, іако по їшесткїи моемъ виї дѣтъ волци тѣжи (люти) въ вѣсѣ, не щадящїи стада. И ѿ вѣсї са-михъ козстанутъ можїи глаголющїи развращенна, єже ѿгоргати оче-ники въ скдѣ себѣ“.

И се, что было предсказано исполнилося. Въ Христовой Церкви одъ початку нашлися люди, котры учили переворотно. Але тѣ першѣ ереси скоро сchezли, якъ роса на сонцю, такъ что днесъ уже лишь ихъ память сохраняется. Такѣ были: аріяне, монофизиты, пелагіане, иконоборцѣ и пр. Изъ тыхъ ересей, якѣ еще и въ нынѣшнихъ часахъ существуютъ, найважнѣйшѣ суть: 1. лутеране, 2. кальвине, 3. баптисты, 4. суботники.

1. Ересь лутерановъ происходитъ одъ Лутера изъ рока 1520. Онъ бывъ католицкимъ монахомъ въ Витенбергу, потомъ профессоромъ богословія. Много боровся зъ пристрастями своего тѣла, надъ

котрими не бывъ въ силѣ запановити. Въ сей душевной борьбѣ пришовъ на ту думку, что человѣкъ про первородный грѣхъ на только ослабѣ, что не може ничего здѣлати для своего спасенія. Боротися противъ грѣха есть излишное дѣло, доста, если человѣкъ вѣруе въ Христа и сія вѣра спасе его. Изъ сеѧ думки происходитъ цѣла наукa Лутера. По его думцѣ не потребнѣ суть добрѣ дѣла. Покаяніе, св. служба, священство, постъ, монашеское житіе, отпustы, миропомазаніе и пр. излишнѣ дѣла. Доста вѣровати. Вѣру черпати треба не изъ двохъ источниковъ и то изъ св. Писанія и св. Преданія, лишь одиноко изъ св. Писанія. Вѣра лутеранска таже не есть научою Божою, але людскою выдумкою. Все то, въ что люди за 1500 роковъ вѣрили, Лутеръ хотѣвъ перемѣнити и поставить свой блудъ на мѣсто Христовоѣ науки.

Ересь Лутера не принесла нѣякого добра для людей; за нимъ почалися довголѣтнѣ войны и довго лялася людска кровь. На несчастя ересь Лутера розширилася лишь меже сѣверными народами; меже русинами не мае ни одного вѣрника.

2. Науку Лутера дальше розширивъ Кальвінъ въ Швайцарії. Онъ выкинувъ изъ церкви престоль, св. образы, статуѣ, выгнавъ монаховъ изъ монастырей и заказавъ всякѣ каѳолическѣ богослуженія. О найсв. Евхаристіи учивъ, что тамъ не е присутній Іисусъ Христось. Свою науку ширивъ мечемъ и огнемъ. Ересь Кальвина нашла вѣрниковъ изъ болытоѣ части лишь меже француузами и мадярами.

3. Слѣдами сихъ первыхъ еретиковъ пошли XVI-го столѣтія баптисты. Они приняли ересь Кальвина, але до того еще запровадили крещеніе взросlyхъ людей. Всѣ тайны Христомъ установленѣ откинули и мечтаютъ о 1000-лѣтномъ панованіи І. Христа на землѣ; себе держать святыми, а другихъ христіянъ безбожниками. Ихъ наука, что лишь взрослыхъ людей можно крестити противляется науцѣ Христа, бо Христось и малыхъ дѣтей хоче спасти черезъ св. крещеніе. Стародавній христіянскій писатель Оригінесъ (250) пише: „Церковь одъ апостоловъ якъ преданіе перебрала крещеніе дѣтей“. (In. ep. ad. Rom. 5, 9).

Баптисты найлѣпше розширенѣ въ Англіи и въ Америцѣ; у насъ появилися лишь въ найновѣйшихъ часахъ. Число ихъ на цѣломъ свѣтѣ пять мил., коли число греко- и римо-каѳоликовъ перевысшає 300 мілліоновъ. Вѣра баптистовъ есть одъ Христа? Нѣть! Она есть ересею и блудомъ еретиковъ: Кальвина и Єомы Минцера.

4. Субботники, або адвентисты такожъ не происходять отъ Христа, але одъ американского фармера, Вилліамъ Міллера изъ рока 1831.

Они учатъ: конецъ свѣта уже не далеко; приходитъ Христось и воскрешає праведныхъ и зъ ними буде пановати за 1000 роковъ, потомъ воскреснутъ и злѣ и тогды буде страшный судъ. Мѣсто недѣли треба святковати субботу. Субботники уже больше разъ назначили терминъ прихода Христа, але все помылилися. Про сеѣ многѣ одъ нихъ одступили. Христось бо выразно сказавъ: „Не вѣсте (не

знаете) днѣ й часѣ, къ ѿнкже Сынъ человѣческїй пройдетъ“ (Мѳ. 25, 13). А зновъ: „О днї же томъ и часѣ никтѣ не вѣстѣ, ни ангелы не вѣстїи, тѣкмѡ Отѣцъ м旤й єдинъ“ (Мѳ. 24, 36). Таке и субботники не могутъ знати!

Свою науку субботники розширяють численными газетами и грошми изъ Америки; головно остро выступаютъ противъ головного пастыря стада Христового, римского отца. Число ихъ въ Европѣ малое; по войнѣ почали зновъ сильну агитацію и въ нашей епархїи. Многъ изъ нашихъ схизматиковъ пристали до нихъ.

Всѣ сесь ереси суть нападами діявола на Церковь Христову. Христосъ навпередъ зновъ, что „врата адова“ нападати будуть на Его Церковь, але и то предсказавъ, что „врата адова не одолѣють (не переможутъ) ей“. Стойте въ вѣрѣ христ.-каѳолической твердо и держтесь далеко одъ товариства еретиковъ! Христосъ лишь одну Церковь основавъ, котра непоколебимо стоитъ на твердомъ камени св. Петра и его наслѣдниковъ, римскихъ отцовъ.

Мѣсячное намѣреніе на Май.

Якій корень, такое и дерево. Якъ корень здоровый, то и дерево здоровое; погубленый корень то и деревина занидѣе, пропаде. Основою, коренемъ громадъ, народовъ и державъ е родина. Яка родина сякъ бывають звычайно и громады, народы и цѣлѣ державы. Господь Богъ позволяетъ на основаніе родинныхъ гнѣздъ, абы изъ нихъ выростали честнѣ громадяне, праведнѣ христіяне и абы они засельовали небесное царство святыми. Изъ родин не смѣютъ выходити проступники, котрѣ были бы новыми жертвами для пекла. Родина буде здорова, добра, свята, коли въ ней буде правдивый христіянскій духъ. Если же въ родинѣ заволодѣе духъ діявола, тогда и выростати будутъ изъ неѣ не дѣти Божѣ, але слуги Христового ворога, бо якое дерево, сякъ овочѣ. По Божимъ намѣрамъ родины христіянскѣ мають быти праведнѣ, святѣ и мають всягды розсѣвати христіянску святость и праведность. Въ той цѣли поднесъ Господь Богъ Іисусъ христіянское супружество (малженство) до достоинства св. Тайны. На жаль, новомодное поганство всѣми способами змагається опоганити, отровити и погубити сесь корень родинного житя. Всѣмъ намъproto треба дуже гадковати, абы сеся погана, загубна отрова не досталася до нашихъ христіянскихъ хижъ. Здоровое житя буде въ нашихъ родахъ, отпорное на впливъ поганства и грѣха, если будутъ они перенятѣ симъ духомъ, якій оживлявъ Пресвяту Родину въ Назаретѣ. Перенесися, брате солодкій и сестро во Христѣ, духомъ до худобного домка въ Назаретѣ и припозирайся житю Господа Іисуса, Пресв. Его Матери и св. Іосифа Обручника. Змагайся одгадати, одчути и перенятися симъ духомъ, якій тамъ пановавъ. Что впадає тобѣ передовсѣмъ въ очи? Что тамъ видишъ?

1. Духъ вѣры переймае на скроэь Пресв. Родину. Живуть они на землѣ, та не для землѣ а для неба! Ихъ душѣ зверненѣ всегда на Бога и небесное царство. До него звертають всѣ свої змаганя, стремленія.

2. Эъ духомъ вѣры иде у парѣ и духъ посвяты, жертвы, якій проявляется у членовъ Пресв. Родины на каждомъ кроцѣ. Не обсыпавъ ихъ Богъ небесный богатствами, розкошю, выгодою. Чрезъ весь часъ живуть въ худобности и недостаткахъ. Жереломъ ихъ доходка праця ихъ рукъ. Они нащадки славного Давидового царского рода якъ простѣ заробники заробляютъ на хлѣбъ насущный. Однакъ всѣ то переносятъ спокойно, безъ нарѣканя. Они свѣдомъ сего, что терпѣніе и недостатокъ посылае имъ ласкава, милосердна рука небесного Отца. Ся свѣдомость вливае во нихъ спокой, силу и постоянность.

3. Духъ молитвы и богоубойности товаришить имъ во всѣхъ обстоятельствахъ. Працю переплѣтаютъ молитвою. Молитва, размова зъ Богомъ небеснымъ, се ихъ наймилѣйше занятіе. Молитвою день зачинаютъ и кончать его молитвою. Іду и спочинокъ освячуютъ молитвою. Она з'еднуе обильну росу небесної благодати на всѣ ихъ и найзвычайнѣйшѣ занятія; она скрѣплея ихъ середъ горя и терпѣній.

4. Духъ взаимної любви отсе дальша черта Пресвятої Родины. Нѣ слѣду тамъ низького, вузкого самолюбія. Одно другого честує и одгадує его потребы. Взаимно собѣ помагаютъ и услугують. Изъ сеї любви выростае якъ косиця (квѣточка) правдива христіянска терпеливость, безъ котрої нѣколи не буде въ родинѣ гаразду, едности и згоды. „Глаготы єднѣ єднаго носите и таکо исполните законъ Христовъ“ — каже дуже мудро св. Павель Апостоль.

Боже дай, aby сей духъ вѣры, богоубойности, молитвы, посвяти, любови и терпеливости водворився и розвинувся въ всѣхъ родахъ руськихъ и по всемъ свѣтѣ, чтобы уступивъ изъ межи нась духъ самолюбія, гнѣва, лѣнивства, піянства и безвѣрія! Тогда наставъ бы межи нами гараздъ и вдоволеня! Тогда родини нашѣ выдавали бы великихъ святихъ людей. Тогда изъ дня на день зростали бысьме и крѣпшли и не перемагали бы нась нашѣ вороги. — Молѣмся о се горячо въ семъ мѣсяци. Най Пресв. Родина буде намъ взоромъ во всѣхъ путяхъ нашихъ!

[В. С.]

Выйшла нова вѣрооборонна брошурка

„СЛОВО про св. Церковь Христову“

Содержаніе: 1. Колько есть Церквей Христовыхъ. 2. Котра есть правдива Христова Церковь? 3. Почему упознati, ци належить дакто до правдивої Церкви Христової. — Опроверженіе закидовъ противниковъ.

Цѣна одного примѣрника 1 Кч вже зъ почтою.

НОВОСТИ

Смерть. Въ Страйнѣ (окр. Свалява) умеръ 1-го апрѣля с. р. кураторъ Коневичъ Андрій, который черезъ 15 лѣтъ неутомимо трудився на славу Божу при храмѣ Стройнскай и найвѣрнѣйше сповнявъ кураторску службу. Смерть его есть великою утратою на Страйниску гр. каѳ. Церковь, понеже покойный не лише церковный маєтокъ сохранявъ и змагався побольшати, но вразомъ якъ вѣрный гр. каѳоликъ стереживъ стадо Христовое одъ розпаденія и одъ возвокъ. Гасломъ его бывъ: любовь къ Богу, любовь къ ближнему. Коли уже про старость (72 р. мавъ) и про тяжку хвороту (астма) дале працьовати не могъ и одказався, боголюбимый Владыка нашъ Петро въ окремѣшномъ листѣ подяковавъ старику за вѣрну и щиру службу. На жаль, сіе письмо прибыло на самый день его смерти и сякъ духовникъ лишь на погребѣ прочитавъ ему заслуженное епископское благодареніе, что цѣла громада, — котра явилася на погребѣ oddala любимому кураторови почесть — до глубины сердця тронуто, — густыми слезами въ очахъ, слухала. Милый нашъ брате! Най буде сонъ твой тобѣ спокойный и радостю повный, най же твоя память меже нами на вѣки!

Чиричъ Ириней сербскій схизматицкій епископъ пошовъ. Але передъ своимъ одѣздомъ разписався въ ужгородской мадярской газетѣ и хвалився, что ему удалось подъ сими пару мѣсяцями навернути на „прав.“ вѣру коло 100.000 душъ. Се не правда и дуже чудуемеся, что Ириней смѣвъ такое твердити. Уже восьмий рокъ, якъ держить наша нещастна религійна борьба, але и подъ симъ довгимъ часомъ не назбиралося 100.000 схизматиковъ. Е ихъ, котрѣ по закону перейшли о. 10—20.000; другъ лише збаламученъ и чекаютъ что буде дальше. Противно, то е правда, что одколи Ириней туй дѣйствує многъ изъ схизматиковъ лишили ересь и вернулися назад у Христову Церковь. Навѣть одень священикъ им. Вицинекъ, кто бывъ изъ узшоў ради Иринея, ставъ греко-каѳо-

ликомъ. Такожъ повѣдомляють насъ и о томъ, что гдекотрѣ батюшки одступили одъ Иринея и пристали до Савватія! Если Ириней подъ 3-ма мѣсяцями могъ навернути 100.000 душъ, прочно не иде до Китаю, тамъ найде доста великое поле для своего дѣйствования?!

Нова книжочка. ОО. Василіяне видали цѣнну книжочку про Церковь Христову. Вручаеме въ увагу вѣрниковъ и духовенства. Цѣна 1 Кч.

Миссія въ Мукачовѣ. Шестого тыждня св. великого поста ОО. Василіяне въ Мукачовѣ, въ городѣ держали св. миссію. На заключеня миссії въ Цвѣтной Недѣлѣ прибывъ до Мукачова и Преосв. Владыка изъ Ужгорода. Туй зазначиме, что сего року въ Мукачовѣ и въ Ужгородѣ о. Решетило державъ дух. реколлекціѣ для учениковъ гим-

назівъ. Въ Ужгородѣ на заключеню реколлекціи была архіерейска св. служба и Преосв. Владика красними словами звертався до молодежи взываючи ихъ до вытревалости въ вѣрѣ и моральности.

Въ Лучкахъ передали гр. католикамъ и фару. Дня 1-го апрѣля была передача фары въ Вел. Лучкахъ. Батюхъ чтобы одтягнути передачу, почавъ на фарѣ Богослуженя кончити. По Богослужению жандары выносили меблѣ батюха изъ фары и розкѣряли схизматиковъ. Кошты екзекуції выносять о. 70.000 Кч. что интабуловали на маєтокъ двохъ кураторовъ, Балога и Чайбина. Сѣ кошты творять лише малу частинку тобъ величезноѣ сумы, что схизматики мають заплатити за то, что повѣрили словамъ батюховъ и почали бавитися зъ вѣрою. За забаву треба заплатити. Переданя фары Лучанскоѣ е доказомъ того, что въ Республіцѣ не можъ безкарно порушати чужій маєтокъ.

Апостольство молитвы. Въ Терновѣ (ж. Марам.) число причастниковъ года 1926. было 1273

окремъ пасхальнихъ. Се е вислѣдъ дѣйствованія Ап. молитви, что въ Терновѣ має 110 членовъ. Примѣръ для послѣдованія. Въ Вишнихъ Верещихъ было въ 1926 г. 3678 св. Причастій. Се треба завдячити „Апостольству Молитви“. Честь обомъ проводникамъ мѣстныхъ организацій. Ужгородска церковь ОО. Василіянъ, числила около 10.000 св. Причастій завдяки Братству Пресв. Сердця Іисусового.

Розочаровання схизматиковъ. Схизматики думали, что приходомъ Иренея зновъ почнуть своє насильствія и напады на гр. католикъ и на ихъ церкви. Але скоро вытвердилися изъ сеѣ думки, бо Иреней всягdi напоминає ихъ, чтобы честовали такъ свободу, якъ и маєтокъ гр. католиковъ. Батюшкамъ такожъ не любиться Ириней, бо пожадає одъ нихъ порядокъ и ученость. Ириней мавъ заявити, что сихъ боятровъ, кочишовъ, мурниковъ готовъ одпустити и мѣсто нихъ принесе образованыхъ священниковъ изъ Сербії. Зато гдеякъ одступили одъ него и пристали до Савватія.

ПЕРЕПИСКА РЕДАКЦІЇ.

Мих. Козикъ, Гукливе. Вы пишете: Батюхъ Пастуховъ казавъ на мене, что я хотѣвъ быти батюхомъ але не повелося и зато я дуже сердитый. Я давно знавъ за Буштинску фабрику, что батюховъ фабрикуе, але я благодарю Богу, что и на хвилю не пришла менѣ на гадку така мерзка думка. — Что схизматики вломилися въ Вашу хижу и наробили шкоду, то напишѣть тогды, коли дня 30. апрѣля докончиться судовий процесъ на судовой столицѣ.

Глава Церкви... Не бери до рукъ. Безименнѣ засылки не можемо помѣстити.

„Батюшка“ Берегово. Треба намъ еще мало посовѣтоватися, ци выдати ту комедію. Думка добра, переведеня також. Цѣкаво читати. Зъ выдрукованіемъ еще почекайме.

ОДЪ АДМИНИСТРАЦІѢ.

Миронъ Стефанъ Ивановъ, Росушка. 14. януара с. р. получилисме одъ Васъ 10 Кч. яко предплатное на 1927 р.

За благословенiemъ Епархіальною Правительства Мукачевскою.